

乾
隆
大
藏
經



釋淨空敬題





龍

藏

般大
若乘
部經

普爲出資及讀誦受持
 輾轉流通者回向偈曰
 願此功德 回向有情
 消除業障 增崇福祉
 家門清吉 身心安寧
 生入聖域 沒往西方
 先亡祖妣 歷劫怨親
 俱蒙佛慈 獲本妙心
 兵戈永息 禮讓興行
 人民安樂 世界和平
 四恩總報 三有齊資
 法界眾生 同證菩提

This book is for free distribution. It is not for sale. Printed in Taiwan.

公元二〇〇七年八月出版 恭印貳仟套

乾隆大藏經

景印重編
句讀版本

倡印者：淨空法師

印贈者：香港佛陀教育協會

出版者：財團法人桃園縣至善教育事務基金會

地址：桃園縣中壢市過嶺里16之38號

電話：(〇三) 四二〇—七八〇九

傳真：(〇三) 四二〇—七八一三

淨空法師
影音網址

<http://www.budaedu.org.hk>

<http://www.amtb-aus.org>

<http://www.chinkung.org>

E-mail: amtbhk1@budaedu.org.hk

purelandcollege@iinet.net.au

承印者：世樺國際股份有限公司 (〇二) 二二四六九九二八

ISBN 978-986-83622-0-8

御製

佛光恩照三千大千
恒沙法界普度衆生
身心安泰年時豐稔
日月升恒乾坤清寧
上下樂利中外協和
萬善圓成情與無情
大清雍正十三年四月初八日
隨緣徧滿
悉證菩提
風雨調順
百昌蕃熾
庶物咸亨
同登正覺

第九冊目次

般若部

一大般若波羅蜜多經六百卷

唐三藏法師玄奘奉詔譯

卷第四八一、卷第五四〇

一、一〇八

第三會

(二) 舍利子品 (卷四八一、四八二)	一	二五
(三) 善現品 (卷四八二、四九八)	二五	二九三
(四) 天帝品 (卷四九八、五〇〇)	二九三	三二一
(五) 現宰堵波品 (卷五〇〇、五〇二)	三二一	三四七
(六) 稱揚功德品 (卷五〇二、五〇三)	三四七	三六六
(七) 佛設利羅品 (卷五〇三)	三六六	三七三
(八) 福聚品 (卷五〇三、五〇四)	三七三	三九四
(九) 隨喜迴向品 (卷五〇四、五〇五)	三九四	四一一
(十) 地獄品 (卷五〇五、五〇六)	四一一	四二七
(十一) 歎淨品 (卷五〇六、五〇七)	四二七	四四二
(十二) 讚德品 (卷五〇七)	四四二	四四八
(十三) 陀羅尼品 (卷五〇八、五〇九)	四四九	四六九

(十四)	魔事品	(卷五〇九)		四六九	四八五
(十五)	現世間品	(卷五一〇)		四八六	五〇一
(十六)	不思議等品	(卷五一一)		五〇二	五〇五
(十七)	譬喻品	(卷五一二)		五〇五	五一九
(十八)	善友品	(卷五一三)		五二〇	五三七
(十九)	真如品	(卷五一四)		五三八	五五八
(二十)	不退相品	(卷五一五)		五五九	五八五
(二十一)	空相品	(卷五一六)		五八五	六一五
(二十二)	殞伽天品	(卷五一七)		六一五	六一七
(二十三)	巧便品	(卷五一八)		六一七	六六七
(二十四)	學時品	(卷五二〇)		六六七	六七五
(二十五)	見不動品	(卷五二一)		六七六	七一〇
(二十六)	方便善巧品	(卷五二三)		七一〇	七八一
(二十七)	慧到彼岸品	(卷五二七)		七二二	七九八
(二十八)	妙相品	(卷五二八)		七九八	八六六
(二十九)	施等品	(卷五三二)		八六六	九一九
(三十)	佛國品	(卷五三五)		九一九	九二八
(三十一)	宣化品	(卷五三六)		九二八	九五八

第四會

第四會序

.....

九五九

(一) 妙行品(卷五三八、五三九)

.....

九六〇、九七八

(二) 帝釋品(卷五三九)

.....

九七八、九八七

(三) 供養宰堵波品(卷五三九、五四〇)

.....

九八七、一〇〇八

大般若波羅蜜多經卷第四百八十一 劔一

唐三藏法師玄奘奉 詔譯

第三分舍利子品第二之三

復次舍利子。諸菩薩摩訶薩修行般若波羅蜜多。不作是念。我於法界若速現等覺。若不速現等覺。何以故。舍利子。無有少法能於法界現等覺故。舍利子。是菩薩摩訶薩不見少法離法界者。不見法界離諸法有。不見少法即法界者。不見法界即諸法有。何以故。舍利子。法與法界非即離故。舍利子。是菩薩摩訶薩不作是念。法界能爲諸法因緣。不作是念。如是諸法能證法界。何以故。舍利子。是菩薩摩訶薩尚不見有少法。何況有法能證法界。舍利子。是菩薩摩訶薩不見法界與空相應。亦不見空與法界相應。諸佛亦爾。何以故。舍

利子。空與法界非相應。非不相應。非即離故。舍利子。諸菩薩摩訶薩修行般若波羅蜜多。與如是法相應。故當言與般若波羅蜜多相應。復次舍利子。諸菩薩摩訶薩修行般若波羅蜜多。不見法界與空相應。亦不見空與法界相應。舍利子。是菩薩摩訶薩不見色與空相應。亦不見空與色相應。不見受想行識與空相應。亦不見空與受想行識相應。舍利子。是菩薩摩訶薩不見眼處與空相應。亦不見空與眼處相應。不見耳鼻舌身意處與空相應。亦不見空與耳鼻舌身意處相應。舍利子。是菩薩摩訶薩不見色處與空相應。亦不見空與色處相應。不見聲香味觸法處與空相應。亦不見空與聲香味觸法處相應。舍利子。是菩薩摩訶薩不見眼界與空相應。亦不見

空與眼界相應。不見耳鼻舌身意界與空相應。亦不見空與耳鼻舌身意界相應。舍利子。是菩薩摩訶薩。不見色界與空相應。亦不見空與色界相應。不見聲香味觸法界與空相應。亦不見空與聲香味觸法界相應。舍利子。是菩薩摩訶薩。不見眼識界與空相應。亦不見空與眼識界相應。不見耳鼻舌身意識界與空相應。亦不見空與耳鼻舌身意識界相應。舍利子。若菩薩摩訶薩修行般若波羅蜜多。能如是相應。是爲第一與空相應。舍利子。是菩薩摩訶薩。由與如是空相應。故不墮聲聞獨覺等地。成熟有情。嚴淨佛土。疾證無上正等菩提。舍利子。諸菩薩摩訶薩。諸相應中。與般若波羅蜜多相應。最爲第一最尊最勝最上最妙最高最極無上無上無等無等。

等。何以故。舍利子。如是般若波羅蜜多相應。即是空相應。即是無相相應。即是無願相應。故。舍利子。諸菩薩摩訶薩。與如是般若波羅蜜多相應時。當知即爲受菩提記。若近受記。舍利子。是菩薩摩訶薩。由此相應。能爲無量無數有情作大饒益。舍利子。是菩薩摩訶薩。不作是念。我與般若波羅蜜多相應。不作是念。我於菩提已得受記。若近受記。不作是念。我能嚴淨佛土。我能成熟有情。不作是念。我當證得所求。無上正等菩提。轉妙法輪度無量衆。何以故。舍利子。是菩薩摩訶薩。不見有法離於法界。不見法界離諸法。有。不見有法能行般若波羅蜜多。不見有法得佛授記。不見有法能得無上正等菩提。不見有法能嚴淨佛土。不見有法能成熟有情。何以故。舍利

子。諸菩薩摩訶薩修行般若波羅蜜多時。畢竟不起有情等想。所以者何。諸有情等畢竟不生亦復不滅。彼既畢竟不生不滅。云何當能修行般若波羅蜜多。如諸有情不生不滅。諸法亦爾。舍利子。是菩薩摩訶薩不見有情。諸法生故修行般若波羅蜜多。不見有情。諸法滅故修行般若波羅蜜多。達諸有情及法。空故修行般若波羅蜜多。達諸有情及法。非我故修行般若波羅蜜多。達諸有情及法。不可得故修行般若波羅蜜多。達諸有情及法。遠離故修行般若波羅蜜多。舍利子。諸菩薩摩訶薩修行般若波羅蜜多時。與空相應。最爲第一。與般若波羅蜜多相應。最尊最勝。無能及者。舍利子。諸菩薩摩訶薩如是相應。能正引發大慈大悲及餘無量無邊佛法。由此

勢力畢竟不起慳貪犯戒念恚懈怠散亂惡慧雜染之心。爾時舍利子白佛言。世尊。若菩薩摩訶薩與般若波羅蜜多相應。是菩薩摩訶薩從何處沒來生此間。從此間沒當生何處。佛告尊者舍利子言。若菩薩摩訶薩與般若波羅蜜多相應。是菩薩摩訶薩或從餘佛土沒來生此間。或從人中沒來生此間。舍利子。若菩薩摩訶薩與般若波羅蜜多相應。從餘佛土沒來生此者。是菩薩摩訶薩速與般若波羅蜜多相應。由此因緣轉生便得深妙法門。疾現在前。從是已後恒與般若波羅蜜多速得相應。在所生處常值諸佛。供養恭敬尊重讚歎無空過者。舍利子。若菩薩摩訶薩與般若波羅蜜多相應。從覩史多天沒來生此者。是菩薩摩

訶薩於六波羅蜜多常不忘失恒現在前。於一切陀羅尼門三摩地門亦常不忘失恒現在前。舍利子。若菩薩摩訶薩與般若波羅蜜多相應。從人中沒來生此者。是菩薩摩訶薩除得不退轉其根昧鈍。不能速與般若波羅蜜多相應。於陀羅尼門三摩地門俱未自在。不能數數現前。又舍利子。汝復所問。若菩薩摩訶薩與般若波羅蜜多相應。是菩薩摩訶薩從此間沒當生何處者。舍利子。是菩薩摩訶薩從此沒已生餘佛土。從一佛國至一佛國。隨所生處常遇如來應正等覺。乃至證得所求無上正等菩提。恒不離佛。復次舍利子。有菩薩摩訶薩無方便善巧故。雖能現起四靜慮。亦能修行六波羅蜜多。由得靜慮故。生長壽夭。隨彼壽盡來生人間。值遇諸佛供養

恭敬尊重讚歎。修行六種波羅蜜多。而根昧鈍不極明利。復次舍利子。有菩薩摩訶薩雖得靜慮修行般若波羅蜜多。而無方便善巧。故棄捨靜慮生於欲界。當知是菩薩摩訶薩根亦昧鈍不極明利。復次舍利子。有菩薩摩訶薩雖能入四靜慮。亦能入四無量。亦能入四無色定。亦能修四念住。四正斷。四神足。五根。五力。七等覺支。八聖道支。如來十力。四無所畏。四無礙解。大慈大悲大喜大捨。十八不共法。而有方便善巧。故不隨靜慮無量無色勢力而生。但生有佛世界。常遇如來應正等覺。不離般若波羅蜜多。於賢劫中定當作佛。復次舍利子。有菩薩摩訶薩。雖能起四靜慮。四無量。四無色定。而有方便善巧。故不隨靜慮無量無色勢力而生。還生欲界或刹帝

利大族或婆羅門大族或長者大族或居士大族。爲欲成熟諸有情故。復次舍利子。有菩薩摩訶薩。雖現入四靜慮四無量四無色定。而有方便善巧故。不隨靜慮無量無色勢力而生。還生欲界或四大王衆天或三十三天或夜摩天或覩史多天或樂變化天。或他化自在天。爲欲成熟諸有情故。或爲嚴淨自佛土故。常遇諸佛供養恭敬尊重讚歎無空過者。復次舍利子。有菩薩摩訶薩。雖能現入四靜慮四無量四無色定。而有方便善巧故。從此處沒生梵世中。作大梵王威德自在遊諸佛土。從一佛國至一佛國。其中菩薩未證無上正等覺者。勸證無上正等菩提。已證無上正等覺者。請轉法輪饒益一切。復次舍利子。有菩薩摩訶薩。一生所繫。修行般若波羅蜜。

多有方便善巧故。雖現起四靜慮四無量四無色定。修四念住。四正斷。四神足。五根。五力。七等覺支。八聖道支。空三摩地。無相三摩地。無願三摩地。而不隨靜慮無量無色勢力而轉。現前奉事親近供養。現在如來應正等覺。於此佛所勤修梵行。從此間沒生覩史多天。隨彼壽量諸根無缺。具念正知。無量無數百千俱胝那庾多天衆恭敬圍遶。來生人中。證得無上正等菩提。轉妙法輪度無量衆。復次舍利子。有菩薩摩訶薩。得六神通。不生欲界。不生色界。不生無色界。遊諸佛土供養恭敬尊重讚歎諸佛世尊。修菩薩行。乃至證得所求無上正等菩提。復次舍利子。有菩薩摩訶薩。得六神通。遊戲自在。從一佛國至一佛國。所經佛土。無有聲聞獨覺乘名。唯有一乘諸。

菩薩衆。復次舍利子。有菩薩摩訶薩得六神通遊戲自在。從一佛國至一佛國。所經佛土有情壽量不可數知。復次舍利子。有菩薩摩訶薩得六神通遊諸世界。從一世界至一世界。或有世界不聞佛名。法名。僧名。是菩薩摩訶薩往彼讚歎三寶功德。令諸有情深生淨信。由斯長夜得大饒益。是菩薩摩訶薩從此命終生有佛界。修菩薩行。漸次證得所求無上正等菩提。復次舍利子。有菩薩摩訶薩從初發心得四靜慮。四無量。四無色定。修四念住。四正斷。四神足。五根。五力。七等覺支。八聖道支。修佛十力。四無所畏。四無疑解。十八不共法。是菩薩摩訶薩。不生欲界。不生色界。不生無色界。常生能益有情之處。利益安樂所化有情。復次舍利子。有菩薩摩訶薩。從初

發心能入菩薩正決定位。乃至能住不退轉地。復次舍利子。有菩薩摩訶薩。從初發心便能展轉證得無上正等菩提。轉妙法輪度脫無量無數有情。令獲殊勝利益安樂。於無餘依般涅槃界而般涅槃。般涅槃後所說正法。若住一劫。若一劫餘。饒益無邊諸有情類。復次舍利子。有菩薩摩訶薩。從初發心能與般若波羅蜜多相應。與無量無數百千俱胝那庾多菩薩摩訶薩。恭敬圍遶遊諸佛土。供養恭敬尊重讚歎諸佛世尊。成熟有情嚴淨佛土。復次舍利子。有菩薩摩訶薩。修行般若波羅蜜多。得四靜慮。四無量。四無色定。能於其中自在遊戲。謂先入初靜慮。從初靜慮起入滅等至。從滅等至起入第二靜慮。從第二靜慮起入滅等至。從滅等至起入第三靜慮。從

第三靜慮起入滅等至。從滅等至起入第四靜慮。從第四靜慮起入滅等至。從滅等至起入空無邊處。從空無邊處起入滅等至。從滅等至起入識無邊處。從識無邊處起入滅等至。從滅等至起入無所有處。從無所有處起入滅等至。從滅等至起入非想非非想處。從非想非非想處起入滅等至。如是舍利子。菩薩摩訶薩修行般若波羅蜜多。方便善巧於諸等至。次第超越順逆往還遊戲自在。復次舍利子。有菩薩摩訶薩。雖已得四念住。四正斷。四神足。五根。五力。七等覺支。八聖道支。亦已修佛十力。四無所畏。四無礙解。十八佛不共法。而不取預流果。若一來果。若不還果。若阿羅漢果。若獨覺菩提。若佛無上正等菩提。是菩薩摩訶薩修行般若波羅蜜多。有方便。

善巧故。令諸有情修四念住。四正斷。四神足。五根。五力。七等覺支。八聖道支。得預流果。或一來果。或不還果。或阿羅漢果。或獨覺菩提。亦令有情修佛十力。四無所畏。四無礙解。十八佛不共法。證得無上正等菩提。舍利子。此諸聲聞獨覺果智。即是菩薩摩訶薩忍。舍利子。是菩薩摩訶薩當知。已住不退轉地。安住般若波羅蜜多。能爲斯事。復次舍利子。有菩薩摩訶薩。安住六波羅蜜多。淨觀史多天宮。此賢劫中。當得作佛。利益安樂無量有情。復次舍利子。有菩薩摩訶薩。修行般若波羅蜜多。雖已得四靜慮。四無量。四無色定。已修四念住。四正斷。四神足。五根。五力。七等覺支。八聖道支。亦已修佛十力。四無所畏。四無礙解。十八佛不共法。常勤修學趣菩提行。而於四。

諦現未通達。當知是菩薩摩訶薩一生所繫。未得無上正等菩提。復次舍利子。有菩薩摩訶薩修行六種波羅蜜多。遊諸世界安立有情於無上覺嚴淨佛土。當知是菩薩摩訶薩要經無量無數大劫。方得無上正等菩提。復次舍利子。有菩薩摩訶薩安住六種波羅蜜多。常勤精進饒益有情。口常不說引無義語。身心不起招無義業。復次舍利子。有菩薩摩訶薩常以六種波羅蜜多而爲上首修菩薩行。施諸有情一切樂具。須食與食。須飲與飲。須衣服與衣服。須車乘與車乘。須香鬘與香鬘。須卧具與卧具。須舍宅與舍宅。須財穀與財穀。須珍寶與珍寶。須嚴具與嚴具。須僮僕與僮僕。隨餘所須悉皆施與。勸修衆善教斷諸惡。皆令證得常樂涅槃。復次舍利子。有菩

薩摩訶薩化身如佛遍入地獄旁生鬼界人天趣中。隨其類音爲說正法。令獲殊勝利益安樂。復次舍利子。有菩薩摩訶薩安住六種波羅蜜多。化身如佛遍往十方殑伽沙等諸佛世界。爲諸有情宣說正法嚴淨佛土。於諸佛所聽聞正法。恭敬供養尊重讚歎。遍取十方最勝無上微妙清淨佛土之相。而便自起最勝無上嚴淨佛土。於中安處一生所繫諸大菩薩。令疾證得所求無上正等菩提。復次舍利子。有菩薩摩訶薩修行六種波羅蜜多。具三十二大丈夫相八十隨好。莊嚴其身諸根猛利無上清淨。衆生見者無不敬愛。漸次化導令疾證得三乘涅槃。如是舍利子。諸菩薩摩訶薩應學清淨身語意業。利益安樂一切有情。復次舍利子。有菩薩摩訶薩修行般

若波羅蜜多。雖得諸根最勝猛利。而不自舉輕蔑他人。復次舍利子。有菩薩摩訶薩從初發心恒住施戒波羅蜜多。乃至未得不退轉地。於一切時不墮惡趣。復次舍利子。有菩薩摩訶薩從初發心乃至未得不退轉地。終不捨離十善業道。復次舍利子。有菩薩摩訶薩安住施戒波羅蜜多。作轉輪王具大威德。常以財寶給施有情。令其安住十善業道。復次舍利子。有菩薩摩訶薩安住施戒波羅蜜多。攝多百千轉輪王報。由斯值遇無量百千諸佛世尊。供養恭敬尊重讚歎無空過者。復次舍利子。有菩薩摩訶薩安住六種波羅蜜多。常爲有情作法明照。恒不遠離佛法光明。如是展轉乃至證得所求無上正等菩提。舍利子。是菩薩摩訶薩由此因緣。於諸佛法常能

現起。是故舍利子。諸菩薩摩訶薩修行般若波羅蜜多。常不應起有罪身業語業意業。時舍利子白佛言。世尊。云何名爲有罪身業語業意業。佛告舍利子。若菩薩摩訶薩作如是念。何等是身。我由此身而起身業。何等是語。我由此語而起語業。何等是意。我由此意而起意業。舍利子。是名有罪身語意業。舍利子。諸菩薩摩訶薩修行般若波羅蜜多。不得身及身業。不得語及語業。不得意及意業。舍利子。若菩薩摩訶薩修行般若波羅蜜多。得身語意及彼業者。便起慳貪犯戒忿恚懈怠散亂惡慧之心。舍利子。若菩薩摩訶薩修行般若波羅蜜多。起如是心。無有是處。又舍利子。諸菩薩摩訶薩修行般若波羅蜜多。起身語意三種麤重。亦無是處。何以故。舍利子。諸菩

薩摩訶薩修行六種波羅蜜多。能淨身語意三種麤重故。時舍利子白佛言。世尊。云何菩薩摩訶薩淨身語意三種麤重。佛告舍利子。諸菩薩摩訶薩修行般若波羅蜜多。不得身及身麤重。不得語及語麤重。不得意及意麤重。舍利子。如是菩薩摩訶薩能淨身語意三種麤重。又舍利子。若菩薩摩訶薩從初發心。能具受持十善業道。不起聲聞獨覺作意。恒念度脫一切有情。舍利子。是菩薩摩訶薩亦名能淨三種麤重。復次舍利子。有菩薩摩訶薩修行六種波羅蜜多。淨菩提道。時舍利子白佛言。世尊。云何名為菩薩摩訶薩菩提道。佛告舍利子。若菩薩摩訶薩修菩薩行時。不得身業。不得語業。不得意業。不得布施波羅蜜多。不得淨戒安忍精進靜慮般若波羅蜜

多。不得聲聞。不得獨覺。不得菩薩。不得如來。不得一切法。舍利子。是為菩薩摩訶薩菩提道。舍利子。諸菩薩摩訶薩修行六種波羅蜜多。趣菩提道無能制者。時舍利子白佛言。世尊。何緣菩薩摩訶薩修行六種波羅蜜多。趣菩提道無能制者。佛言。舍利子。諸菩薩摩訶薩修行六種波羅蜜多。不取色。不取受想行識。不取眼處色處。不取耳處聲處。不取鼻處香處。不取舌處味處。不取身處觸處。不取意處法處。不取眼界色界眼識界。不取耳界聲界耳識界。不取鼻界香界鼻識界。不取舌界味界舌識界。不取身界觸界身識界。不取意界法界意識界。不取地界。不取水火風空識界。不取四念住。不取四正斷。四神足。五根。五力。七等覺支。八聖道支。不取布施波羅蜜多。